

Amanah sedia pertahan DAP daripada tohmahan Umno
Free Malaysia Today
Dec 11, 2016
Faiz Zainudin

Jamzuri Ardani mendakwa Umno-Barisan Nasional (BN) akan menggunakan modal politik yang sama dalam Pilihan Raya Umum ke-14 (PRU14) dengan menuduh DAP sebagai parti perkauman.

SHAH ALAM: Amanah bersedia menjadi benteng mempertahankan DAP yang sering ditohmah dan difitnah mengamalkan ekstremis perkauman, kata perwakilan Amanah Selangor.

Berucap di Konvensyen Amanah, Jamzuri Ardani mendakwa Umno-Barisan Nasional (BN) akan menggunakan modal politik yang sama dalam Pilihan Raya Umum ke-14 (PRU14) dengan menuduh DAP sebagai parti perkauman.

Katanya, bukan saja Umno menyerang DAP sebaliknya PAS turut melakukan perkara sama sebaik saja tidak lagi bersama Pakatan Rakyat.

“Isu ini digunakan Umno untuk membunuh pakatan dan Amanah perlu berdepan dengan pengundi Melayu untuk meyakinkan mereka DAP bukan ancaman kepada negara, Melayu dan Islam.

“Kita kena berhujah atas fakta dan kebenaran untuk menangkis sentimen kebencian dan prasangka baru yang disebarkan Umno dan sekutu baharu mereka.

“Menghapuskan pemikiran politik kebencian ini ‘core business’ politik Amanah,” katanya ketika membahaskan ucapan presiden di Konvensyen Nasional Amanah hari ini.

Jamsuri berkata demikian sebagai respons kepada ucapan Presiden Umno Datuk Seri Najib Razak pada Persidangan Agung Umno 2016 (PAU2016) yang mengingatkan kaum Melayu dan Islam menolak politik DAP yang disifatkan sebagai bahaya dan bakal menghakis keistimewaan serta hak diperuntukkan dalam Perlembagaan Persekutuan.

Dalam ucapan sama Jamsuri turut mengingatkan kepimpinan Pakatan Harapan (PH) supaya tidak mengambil masa terlalu lama untuk menentukan soal pembahagian kerusi calon pembangkang.

“Kita kena perkuat dan teguhkan PH, buat keputusan yang jelas. Jangan membuang masa dengan mainan politik yang membosankan, ‘ding-dong’ di sana sini, tunggu sana sini.

“Kalau mahu guna 1 logo, segera muktamadkan. Kalau mahu guna satu manifesto pun kita lancarkan. Pembahagian kerusi kena muktamadkan segera. Ini tanggungjawab pimpinan PH,” katanya.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/12/11/amanah-sedia-pertahan-dap-daripada-tohmahan-umno/>